

[Sápmi](#) 8.3.2016 klo 7:04 | beaivduvvon 8.3.2016 klo 21:02

"Dál riikkaidgaskasaš nissoniidbeaivvi galgá leat eambo fuolas sámi albmáin"

Otne, riikkaidgaskasaš nissoniidbeaivve, jurdda jorrá dásseárvui. Suoma beale Sámi jođihit dál nissonolbmot, go Anára stuorra sámeásahusain juohkehaččas lea nissonhoavda. Dál baicce galggašii oažžut sámi albmáid fárrui, oaivvilda Sámedikki ságadoalli Tiina Sanila-Aikio.



Video: Yle Ođđasat 8.3.2016

Suoma beale Sámi jođihit dál nissonolbmot.

Stuorra sámeásahusain dego Sámi oahpahusguovddážis, Sámemusea Siiddas, Yle Sámis ja Sámedikkis juohkehaččas lea nissonhoavda. Nuortalaččaid ovdaolmmošin lea nissonolmmoš.

SámiSoster-searvvi guhká jođihan Ristenrauna Magga mielas nissoniin leatge erenomáš attáldagat jođiheaddjin.



Govva: Vesa Toppari / Yle

– Nissoniin goitge lea viiddis oaidnu. Sii buktet ovdan nissonperspektiivva doaimmaide ja váldet viidásit oppa servodaga, oppa bearraša, oppa birra vuhtii ja dan oainnu vihkkehallet ja dien láhkai lean erenomáš iluin dán merken, Magga muitala.

Go ovdalaš áiggiin nissonat ledje čadnojuvvon ruovttubargguide, odđa áigi lea nuppástuhtán dili, oaidná Sámedikki ságadoalli Tiina Sanila-Aikio.

– Nissonolbmui leamašan dál návccat bidjat earálágan bargguide go ovdal - ja servodatberoštupmi. Dat leamašan dieđusge nissoniid gaskkas juo guhká, muhto dál leat vejolašvuodát nu, ahte mii bastit bargat min servodaga ovdii, Sanila-Aikio smiehttada.

Mo oazžut dievduid mielde servodateallimii?

Anára márkana njealje stuorra sámeásahusas lea juohkehaččas dál nissonhoavda: Liisa Holmberg Sámi oahpahusguovddáza rektorin, Pirita Näkkäljärvi Yle Sámi hoavdan ja Sari Valkonen sámemusea Siida hoavdan. Sámedikkiges eamidastiba hálddahushoavda Pia Ruotsala ja ságadoalli Tiina Sanila-Aikio.

Dál riikkaidgaskasaš nissoniidbeaivvi eambo goit galgá leat fuolas sámi albmáin, oaivvilda Tiina Sanila-Aikio. Dál baicce galggašii sin oazžut eambo fárrui servodatdoaimmaide.

– Servodateallin dán áigge lea dakkár mii dat lea, ja dat ahte mo mii oččošeimmet daid dievdoolbmuid doppe sámi ealáhusain eanet fárrui servodateallimii, de sihkkarit das boahtá leat hástalus boahte áigge.

Riikkaidgaskasaš nissoniidbeaivvis lea guhkes historjá. Jurdda dasa vulggii johtui jo jagi 1910 Köbenhammanis dollojuvvon sosialisttalaš nissoniid kongreassas. Nissoniidbeaivvi ávvudeapmi Suomas lassánii ja viidui 1970-logus, go njukčamánu 8. beaivvis bođii Ovtastuvvan Našuvnnaid temábeaivi.

ON hálida nissoniidbeivviin earret eará čalmmustahttit sohkabeliid gaskasaš dásseárvvu.

Kaisa Aikio / Yle

Martta Alajärvi / Yle